

小
司
馬
奏
草

小司馬奏草叙

往余筮仕為南曹郎與同舍郎子長項
君相友善時時過從劇譚當世之事既
余補外郡去君亦予告歸尋備兵畿輔
君起補夏曹京西距京

朝不遠數數為問如曩時已而祇後檀州
輒渡以馬政邊事相質訂往來亦無間
日會余量移楚粵間與君遂不相聞

數年所甫余以病乞歸君輒移書屬叙
奏草余不嫻文辭更不能識時務即漢
北粵南雖皆經畧處顧不當事權與陪
末議亦至淺陋第匈奴東南夷事稍稍
竊聞之今所覩記奏草詳哉乎其言之
也大率中外建白下部題覆指事叙陳
無可否者弗論矣至其所謂增遼陽之
折色定市本之歲額罷延綏之入衛獨

無益之興作杜撫民之調黜已滇粵之
黷兵禁北虜之請茶謝東夷之乞市稽
撫賞之旁落查將材之獲歷山海關之
節制于遼互市馬之免派于軍開歸正
之踞寬捕盜之條皆動中肯綮切協機
宜近亦畧見施行非徒空言無當而已
若乃請罷成役省閱視抑坐咨寬餉賚
此所由批抗大寮潛奪魁佞君之自詭

于拙者斯其大驗歟竟讀茲編余深有感焉夫不朽有三立言其次詩書隱約
直言極諫者上也即練達時務者亦不
可少為叙篇端俟之知者

維揚錢藻撰

奏草叙畧

談當今之務者曰南備粵北備胡粵之事苟不徼功喜大鵬剿而拊循之足矣胡則異是三衛屬夷分地世官之日久而要賞道虐意既叵測行間剋易撫賞者時復激之如不可問何朔虜東西兩部西窳雄桀今且降名王而餽之厚矣第挾增之漸日滋而豺狼之嗜無已斯

坐救之形也可無限制哉迤東頗奏功
最直易與可而我士馬疲匱故亦不細
借令為市為脩為戰與守善曰故事而
謹備焉庶無難者第疆場諸凡轄在將
領文武六吏不能瑣瑣屑屑計也將領
匪人幾不敗乃事耶此其要在幕府權
在樞府源在政府缺一寧可哉顧沿邊
積習更復頗易即市事歲繒第當約法

如額如則市不如則不市直有戰耳若
薊之近習則差為難薊北

輦轂屬夷屏蔽額設兵將無幾庚戌之後
增置將吏十倍曩時有主兵有客兵有
入衛之兵近募南兵實塞下搃之幾二
十萬歲所糜餉二百萬餘大較諸鎮無
逾薊者頻年無大警日事脩築金湯稍
固軍民益稠輪輿殷殷一大都會矣豈

直天幸哉蓋多人力焉第班軍入衛日甚凋疲遼兵已報罷去延綏去薊太遠入衛兵卒何益于防守之事今數千里歲徵發數千人而歲供無文力役之征什半斃矣不幾人費乎議者謂南兵不可久此不盡然兵貴勇力南北無庸擇也少詰冒濫可矣故事叙錄將材必鷹揚爪牙必戰陣首功者即市場勞瘁僅

僅予賞耳苟不當虜板築荷插非有汗
馬霜露勲也一行登薦便祈推擇閩浙
村官良家子投隸幕府及鬻繒繒賈堅寄
空名於鎮城者豈淺少哉甚輒檄致故
所知客偕與傳來矣歲所上墻堡勞僅
數里許計里二百丈許而所列勞最里
數十人他坐而衣食于縣官者不啻凡
倍即一搃禦也而數人共之文武大吏

亦莫可誰何凡將之材所需知勇苟不
跨馬不穿札以好謀也苟不閑韜畧以
技擊蹶張也驅所不服習者而典關隘
不次稱帥矣儻偶無事可耳即有虜患
是以將予敵也其故謂何否且歟歟藉
藉又何以故哉大司馬公時時謂予直
欲猝挽而堅持之力未遑也丁戊之交
中外事權權貴人盡秉之若之奈何哉

其相左也病廢多暇輒取笥所存駕部
職方奏草葺之大要覆

奏不必盡由中議亦不能盡當

廟議右粵南勤大征而茲以撫插為先漠
北倍金縉而茲以歲增為限遠財匱而
崇賑賚薊林雜而抑奔趨他區調停置
郵少寬捕格者此所繇失貴人之意抑
拙者之明效與詳在草中不復叙詩曰

憂心悄悄僕夫况瘁嗟夫心之疲矣瘁
豈顧問哉傳有之采薇廢則征伐缺矣
出車廢則功力缺矣杖杜廢則師衆缺
矣夫司馬捐讓之法存而三代仁義之
師概見于後世牧民形勢乘馬之篇著
而尊攘之略可睹記焉則盛時之所以
安內攘外者胡可廢也胡可缺也

秀水項篤壽撰

小司馬草卷之一

駕部稿

題爲地方十分困敝乞

恩寬減變賣種馬拖欠銀兩以蘇小民以固邦本事
案呈到部看得南京太僕寺卿何等題稱揚州
等府州縣連年水災要將拖欠變賣種馬價銀共
三萬六千餘兩照依先年事例酌量減免候豐年
帶徵一節爲照種馬變賣一半徵價非常大恩不
得類冀况前議每馬一匹變銀十兩本是常值殊
非多科止緣積久未完遂爲逋累卽今徐鳳淮楊

頻歲水災昏墊已極本官目擊時艱題

請前來無非仰承

德意寬恤元元但各府災傷原有差等所議減緩不無異同相應酌量列爲三等合候

命下劄行南京太僕寺并咨行應天淮揚各巡撫及咨南京都察院轉行印馬御史行令所屬仍照原題每匹十兩事例內將揚州府屬泗州臨淮縣淮安府屬邳州山陽桃源宿遷贛榆清河睢寧沐陽等州縣俱係重大災傷前項馬價擬以十分爲率

准免六分仍追四分自萬曆八年爲始分作三年
徵解限萬曆十年通完其揚州府屬江都儀真二
縣鳳陽府屬壽州宿州懷遠虹縣盱眙定遠靈璧
鳳陽等州縣并滁州建平縣間有水災擬於十分
之內准免四分仍徵六分自萬曆六年爲始分作
三年徵解限萬曆八年通完其應天府屬上元句
容縣鎮江府屬丹徒金壇縣近年頗登擬自萬曆
四年爲始十分爲率派作三年徵解每年帶徵三
分之一限萬曆六年通完各該有司務要依期催

價無復因循再照邦政所需莫急於馬兵家制勝
尤貴於預邇來馬政遞減遞更通計每歲畜牧較
之

祖宗之時已損十之四五且自折色過多則備用已
少自種馬半賣則舊額頓虧雖目前積貯似若苟
完萬一軍興何從猝辦每思

祖宗之盛而不可得欲復

祖宗之舊而未有會私心竊計頗懷隱憂但兩淮一
帶累歲水災民困果極所擬該寺上

請本部覆題萬非得已其餘牧馬地方如北在隸山
東河南等府間歲稍登拖欠亦少司牧事者各當
仍照先題事例嚴行追解毋得藉此爲比以災爲
辭等因萬曆四年三月初十日太子少保本部尚
書譚 等具題本月十二日奉

聖旨是欽此

題爲清庫藏一政體以杜侵魚以實軍需事案呈
到部看得南京太僕寺卿何 等題稱所屬府州
縣各項馬政錢糧無官查理積弊要委府佐等官
清查完欠以杜侵漁及將扣留備荒場租盡數解
部遇有災傷應派備用每馬一匹扣數減徵一兩
及稱該寺先年裁革少卿寺丞各一員積有缺官
俸薪等銀三千七百二十八兩起解外其原派州
縣俸薪通行停徵各一節爲照馬政錢糧

國家大計出納盈縮之數不可不清侵欺那移之弊

愈防愈出本寺深究害源思爲釐正據所建白最
詳且密矣但查先年寺卿何 奏議通行南北直
隸山東河南各撫按選委廉幹官員嚴查所屬馬
政各項銀兩完欠積弊奉有

欽依遵行已久况印馬御史今雖併差然勾稽錢糧
實其職掌則是綜覈之法本非不精而因循之久
漸以旁落若復以查盤之事獨歸該寺則有專職
者議其多門其兼攝者委非已責且南北岡寺俱
爲一體檢察奸弊致有異同非所以專任用而一

法守也合候

命下移文應天淮揚撫按併行北直隸山東河南各
撫按及兩京印馬御史遵照先題事例選委廉幹
官員將所屬馬政各項錢糧逐一清查吏胥之侵
盜者問罪追徵所司之乾沒者叅提催併其兩京
太僕寺卿丞按臨所屬地方仍各通行查考遇有
奸弊照前施行務使未徵者不容掛漏已徵者無
得侵那俾法在必行毋畏奸避怨廢壞牧政至於
應天等府州縣牧馬地租先經寺卿雷題有定

議據稱前項扣銀或解該府或留州縣事體不一
委難清查及訪所扣銀兩未聞幫助貧民止資豪
強拖欠必有定法方杜遺奸但天災不常事體貴
一若盡行解部遇災扣除則文移往返似爲繁鎖
而計筭減補遠滋弊端合將應解部者照舊解部
應扣留者州縣扣徵解府類解南京太僕寺收貯
遇有荒歉地方呈請該寺照災酌助務使貧民沾
協濟之恩豪右無覬覦之望如有仍踵故習欺隱
占賴者各撫按印馬御史及該管太僕寺官嚴查

究問施行其該寺卿丞既以冗官裁革員下柴俸
卽當免科累年積銀盡今起解額派銀數准行停
徵但各縣歲派原有規則此旣停徵則坐派之時
仍要計筭均平以杜奸弊再照留都乃根本重地
積貯又經國要圖况

陵寢寔豐鎬之舊高墻有郭隣之防據嘉靖二十九
等年帑藏告置行令南京兵部取用收貯馬價地
租缺官銀兩三十餘萬隆慶年間閩廣用兵借給
一十五萬若無素所蓄積何以有此卽令

皇上躬行節儉間有餘贏南京衙門無礙官銀所積
無幾其合應收貯者乞

命仍舊存留但使時加稽查無裨侵那似不必務爲
檢括奏題起解致使空虛緩急無備等因萬曆四
年三月十一日太子少保本部尚書譚 等具題
十三日奉

聖旨是欽此

題爲查處驛遞銀兩以昭

聖恩以寬民力事案呈到部看得巡撫保定都御史
孫 巡按直隸御史賀 等會題保定府屬驛遞
工料支應銀兩先年量其衝僻定數支給後因牌
票勘合一體應付支辦繁多自去年八月以後奉
例裁革各驛遞應付較前所省數多及查各驛遞
舊額每年共該工料支應等銀九萬三千六百有
零今議減四萬二千二百有零實止用五萬一千
三百三十五兩要將去年九月起減扣至年終止

共該銀五萬六千三百八十三兩俱貯府庫於內
動支五萬一千三百三十五兩抵作萬曆五年分
各驛遞正用其該年額徵銀兩通行免徵以後再
計實數酌量減派及稱該府地瘠民貧如遇水旱
逋負不齊供應難定前項扣貯銀兩除抵作萬曆
五年正用外如有不敷尚有貯剩二項南馬銀一
萬餘兩并見催蘇常等府未到銀兩責令該府另
貯專備補贖各一節爲照驛遞疲敝救小民困苦仰
荷

聖明軫念真切一時冒濫盡清節省不少委應亟議
寬恤使小民均霑實惠但法貴謀始令出惟行公
差多寡有難以一時爲準盈縮規則當較夫數歲
之常今據該府所議乃自去冬以迄今春時方半
載而保定一府實爲西路總會之區當從寬議况
豐凶不齊完欠難必若以一時節省之數定爲永
久遵行之規倘或差使繁多則支持不給必至賠
補賠補不已必至逃亡逃亡不休必至增派是今
日蠲免之多忘其爲恩他日增派雖少翻以起怨

非所以慎始議爲可繼也但寬一分民受一分之
賜早一日民需一日之惠今撫按合疏具題無非
欲

聖澤流行速於置郵耳相應議擬合無恭候

命下本部移文巡撫都御史及咨都察院轉行巡按
御史督行該府暫將所議支剩銀兩准作萬曆五
年支用如有不給節以南馬等銀帙補本年免派
一年以後照舊徵解但每於年終卽行查算支剩
若干積至幾年約穀一年支用有餘再議免派一

年自是率以爲常用寬民力其河間等府及南直隸各省一體通行查議施行內南馬等銀除通融補贖外若有多餘仍另貯在官專供驛傳緩急如水旱災傷差遣克斥等項支用大抵小民困窮與驛傳疲敝使客跋涉之苦行旅往來之煩俱要公聽並觀旣不宜任其冒破徒爲積奸巨猾之資亦不可過爲減削致失公平正大之體萬曆肆年四月二十九日太子少保兵部尚書譚 等具題五

月初二日奉

奏草

四卷之三

九

聖旨畿輔驛遞疲敝至極該府銀兩旣積有剩餘准免派一年以甦民困各該驛遞衝疲地方都着照例查議行其餘依擬欽此

題爲行移勘合沉匿日久懇乞

聖明嚴究以彰

國法以隆

親親重典事奉本部送禮科抄出禮科都給事中
李等題等因奉

聖旨禮兵二部知道欽此欽遵抄出到部續准禮部
咨稱填發遲速及干係

宗藩者本部查覆外其差人給領一節移咨知會
前來通送到司案呈到部查得各府部院公文行

本部車駕司轉發原無傳遞員役俱附各省差人
順齋見行事例齋文二十角以上方給包馬一匹
遠方差人候久告齋別省順路公文該司恐有遲
滯隨時給發邇來本部查訪便道順齋及武官告
領終非事體行司停止其萬曆二年以前間有誤
事之人隨行拘究尚有見行兵馬司監追及叅送
刑部未結者去年七月間覆議驛傳事宜開款申
明似亦無誤所據該科具題前因查得兩部該司
發行月日及本省塘馬傳遞無一差遲止有川貴

差官所領二件卷開先後據各告稱候久願齋順
路公文該司審各假道河南見有順齋事例川貴
萬里程途不宜留滯來役止圖公私兩便詎意付
託匪人近據禮部該司行查一面回報一面移文
兩省提究及行河南塘馬挨查失落處所復據該
科查叅合候

命下移咨都察院轉行各該巡按御史將紀榮等嚴
提問罪原任該司郎中係遷官事發似應免究再
照部院公移非關官吏選法卽係錢穀刑名并本

部清勾軍單要皆

國家重事急于風火隆慶三年該本部尚書霍具
題不許職官齎領止有差承附帶一途其差承告
領公文只爲希圖包馬此輩半是胥走猾徒不皆
奉公守法中間磨洗之弊甚于稽程增減之奸廣
于脫失況且公文入手互相那換惟圖利便不顧
失遺在馬匹則有合夥行走附帶私人在公文則
有私相授受不赴原行衙門交割縱使事無差誤
終於前件未銷卽今半年之內本部遇有前弊隨

事通行申飭多方禁戢但不敢上瀆

天聽今經言官論奏內除萬曆三年以來久無別省
及武職差人順齋外但各省正差及塘馬技遞未
必如期無誤合行各該撫按及布政使司等衙門
知會務要嚴加清查毋得視爲故事每季終將原
發公文數目併奉到日期咨部查考如逾期不到
及經久方到者行提該役叅問重擬等因萬曆四
年六月初六日本部尚書譚 等具題本月初八
日奉

聖旨是欽此

題爲比例折解班銀以蘇民困事車駕清吏司該
看得巡撫鳳陽兵部左侍郎吳 巡按直隸監察
御史舒 各題稱廬州府屬無爲六安二州合肥
等六縣額僉湖廣等處各

王府校尉每被各府不分逃絕有無勘合一槩濶
提隨解又云脫逃復行提取累民不便乞要比照
河南府屬折銀解府雇人代役一節爲照

親王之國例撥校尉六百名歷相繼補新封

郡王題抄到部本部覆

准有護衛處撥與軍餘十二名民間僉派十二名無
護衛處俱於民間僉派每名每年於均徭內帶徵
銀一十二兩解府雇人代役遵行已久今查

荆

襄等府分封湖廣江西山東河南等處所僉民校
因何派及廬州府所屬州縣况各府原額校尉六
百名數半是錦衣衛校丁撥結半以羣牧所軍丁
改充此皆隸於尺籍不係編氓但

國初間有民戶投充未必盡由行伍或係始封所

撥軍校原籍今乃累及同姓異籍齊民似不能無
再查

荆

淮

襄

鄭四府係是

仁廟諸王肇封於永樂之末就國於宣德之初而

崇

德

興三府又皆受封於天順之後所據鄭文開稱及該
州間列緣由未見的確况

先朝兩都竝建所撥侍從員役攔有南京衛所校軍
及畿輔州郡民戶僉充者本部既無冊籍可據該
州縣又未經一一查詳他如

興府校尉今已改隸

顯陵

梁府國除校丁未知應否裁革况

梁府寢園已隸

顯陵校尉似已歸併今該撫按具題勾解之煩頂補之苦在

藩邸寄力役之名而竟歸於雇役在民間竭力差之費而終併於銀差據例陳情莫非勤恤民隱但事涉

親藩所關非細似難遙度以滋竇擾擬合題請恭候

命下本部移文該撫按轉行該道行無爲六安合肥等州縣備查前項民校僉充來歷中間有無軍籍

併轉咨河南湖廣江西山東各巡撫衙門轉行布
政使司行各

王府長史司備查廬州府屬州縣校尉原籍是否
軍民僉充於何年間奉何事例坐派今復勾補如
果的係民校貫籍有據咨回本部另行議覆如係
軍籍撥補仍照舊例遵行等因萬曆四年七月二
十一日本部尚書譚 等具題本月二十三日奉
聖旨是欽此

題爲數陳末議以仰禪

聖治事車駕清吏司案呈奉本部送准巡撫江西等處地方兼理軍務都察院右副都御史潘 咨等因到部續准都察院咨據巡按江西監察御史張呈同前事案呈到部看得給驛乘傳并應付脚力節奉

欽依已爲詳盡卽如各省起運錢糧始皆編僉糧長解戶經收經解後乃差有押解官員其合用脚價既定有扛解銀兩而一切浮費則解官取諸糧長

解戶糧長解戶於徵收之時不免多取於民後因
通革糧解委官總部謂之官封官解在百姓既免
多取之弊在糧解亦無偏累之苦而扛解銀數仍
舊則水脚諸費亦自足用此條例不給勘合之由
也乃今既革其糧解又減其水脚又不給與勘合
比至途中且有意外之虞各該官員一經差解錢
糧卽如墮落窞窞多方求免至欲棄官以去者於
此不爲酌處委於事體未便合無恭候

命下本部通行各該撫按衙門以後凡遇起解京邊

各項錢糧務要嚴查有無經收糧長解戶及曾否
將先年扛解減削如糧解及扛解仍舊其勘合仍
照例不給若糧解已革扛解復減削過半卽照江
西撫按今議事理給與應付勘合由陸路者每銀
一千兩撥夫二名由水路者每站船一隻以銀十
萬兩爲率撥夫二十名數有不及亦准給與船夫
解官支廩給馬匹隨衛人等不得槩支日糧馬驢
回還之日人夫住起量行給與解官廩糧脚力所
給外號勘合務要開填銀兩數目及脚價多寡以

爲應付等差不得曲徇私情分外填給其原未經
裁減腳價去處不得緣此輒行裁減改給勘合致
滋冒濫等因萬曆四十九年九月二十三日本部尚書
譚 等具題本月二十五日奉

聖旨這起解錢糧官員依擬分別給與勘合回還之
日不准近來訪知勢要官員不係公差的經過有司
驛遞照舊應付各撫按等官全不體朝廷優恤民隱
之意仍踵弊轍阿意奉承今後有違犯的一體查究
欽此

題爲懇乞

天恩俯念殘疲邊邑比例免養官馬拯蘇民困事案
呈奉本部送准總督薊遼保定等處軍務兼理糧
餉兵部左侍郎兼都察院右僉都御史楊 咨到
部送司卷查隆慶六年十一月內爲乞憐

陵寢重地差繁民疲遵例仍免養馬以蘇困苦事該
順天撫按官楊 等題稱昌平州奉祀

諸陵差役繁重乞照鳳陽泗州事例將該州寄養馬
匹盡數發兌以後永爲蠲免本部依擬免派已經

題奉

欽依通行欽遵去後今諛前因查呈到部看得總督
侍郎楊 谷稱密雲縣寄養馬戶率多逃亡貽累
里甲乞要比照昌平州事例將該縣見養馬匹先
行調兌以後量減數分一節爲照馬政重務寄養
地方各有常額減於此必增於彼減者雖以爲恩
增者重以爲累非公平正大之體也且密雲縣雖
爲軍門駐劄之所人馬所聚懋遷亦多較之昌平
州

陵寢所在奉祀人員往來繹絡不同但蕞爾一邑當此有事之時比之嘉靖庚戌以前無事之日差役繁簡自難例視查得近該薊鎮題討寄養馬一千匹已經題覆

准給相應就中酌處合候

命下劄行太僕寺將密雲縣見養馬內臆壯堪兌者儘數調兌該鎮官軍騎征其有不堪兌者仍令喂養不堪喂養者行該管衙門另行酌議後有解到備用馬匹先儘別州縣照舊分派牧養如已足原

數仍派該縣寄養每候該鎮請討之日先儘該縣
調兌給軍騎操不許退回則制額不減民困可蘇
矣等因萬曆四年十月初十日太子少保本部尚
書譚 等具題本月十二日奉

聖旨是欽此

題為仰體

宸衷比例懇

恩蠲免拖欠馬政錢糧以廣

聖澤以安地方事查呈到部看得南京太僕寺卿石
等題稱淮安府屬累被水災要將節年拖欠馬
價草料場租銀共一十一萬五千二百九十三兩
一錢一分已徵者截數起解未徵者悉與蠲免徐
州揚州高郵興化寶應等五州縣均被水災乞將
拖欠馬價草料場租等銀共一萬五千餘兩一體

蠲免及稱鳳陽府屬十八州縣共欠草料場租銀一萬餘兩揚州府屬泰州通州泰興儀真江都如臯六州縣共欠馬價草料場租銀四萬餘兩廣德州建平縣共欠馬價草料場租銀四千餘兩前項州縣疊遭水患要將前欠銀兩除奸徒侵欺者嚴併外其果係小民拖欠實數亦要酌賜蠲免或量減分數各一節爲照馬政錢糧軍需重務本難輕議但淮安等府所屬連歲水災民困已極當年錢糧尚難措辦遠年舊欠何從帶徵雖節經撫按等

官題議本部酌量覆奉

欽依帶徵終是徒寄空名無禪公家實屬而催徵督
促之煩尤爲民間重累况戶部一應錢糧悉蒙蠲
免前項積逋委應酌處今該南京太僕寺卿石
等目擊民艱題

請前來無非仰體

德意優恤困窮相應依擬恭候

命下行移該管撫按并劄行南京太僕寺將淮安一
府自隆慶四年起至萬曆二年止共欠馬價草料

場租銀一十一萬五千二百九十三兩零并徐州
碭山高郵興化寶應等五州縣共欠馬價草料場
租銀一萬五千餘兩如有已徵在官者務令盡數
作速起解不許吏書及經收人役混報未徵侵欺
作弊未徵者悉與蠲免其鳳陽府屬一十八州縣
并揚州府屬泰州等六州縣俱累遭水患其欠馬
價草料場租銀五萬餘兩以十分爲率量免五分
仍照舊議分作三年帶徵扣至萬曆七年爲滿其
廣德州建平縣災傷稍輕欠銀肆千餘兩相應照

舊徵解其餘無災州縣。應馬政錢糧俱要依期完解不得援例奏擾等因。萬曆四年十二月十七日太子太保本部尚書譚等具題二十九日奉聖旨。這馬價銀兩依擬蠲免減徵。以蘇民困。欽此。

題爲敷陳末議以仰裨

聖治事查呈到部看得應天巡撫都御史宋 題稱

奉例節省蘇松常鎮四府所屬驛遞減編站銀七千三百五十七兩二錢零徽寧池太安廣六府州所屬縣驛減編站銀一萬四百六十七兩三分三釐五毫二絲及將蘇松等四府奉例以後節省銀四千三百一十九兩一錢七分三釐已經放給織造仍有未奉例前積存銀一千七百七十四兩三錢七分五毫一絲并徽寧等六府州前後積存備

用銀一萬二千八百七十五兩三錢二分八釐二毫動支抵充織造應用一節查得保定一府俱是陸路每馬一匹每年工料銀或六十或七十兩每驢一頭每年工料銀五十餘兩通計所屬州縣二十驛遞一十六處歲派額銀九萬而民快諸役不在其中蘇松等九府一州俱從水路每名長夫每年工食銀七兩每名水手每年工食銀九兩通計所屬州縣四十有七驛遞二十七處歲派額銀一十四萬而阜快等役俱在其內此額派多寡之由

也卽今奉

日清查保定所議馬驢數目及歲給工料十已裁其
四五但該府止是西路之衝所屬支應衙門較之
蘇松等府纔及一半內馬一匹卽減銀二十驢一
頭卽減銀十兩以故扣至四萬有奇其蘇松等府
所議水手長夫每日工食不過二分難以再減其
所量革名數積筭無多况各府係九省通衢鎮江
池州太平廣德丹陽儀真府州縣又當水陸之會
南京內使進

貢船扛仍照舊額此裁省懸絕之由也及查近來江北旱路募商當差馬驢頭累害已少江南站銀盡入條編總歸雇役一切廩糧無頭戶貼戶私賂之苦一應夫役無排門備差貼差之名此則今日節省之驗也但江南站船水手多者十名少者五六名每名每歲工食銀或十兩或九兩若使出水奉差不為浮食間有脩理聽差動經歲月止應船頭看守其餘水手工食不宜一槩濫支近據浙江見行事例直差則全給一年守候則量行半給凡有

船隻處所似宜以此爲準不特蘇松等府爲然此則今日當議之要也再照先議外號填給勘合造冊具

奏回銷甚便檢查尚未一一遵行南京兵部及各督撫按部屬各差關給外號勘合止據文移請討得之稍易填給不無假借未必盡奉公差經過地方官員私用傳牌不無仍蹈宿弊此則所當再行申飭釐正及設法稽查者也合無恭候

命下本部移文應天撫按等官將蘇松等九府一州

減編驛傳事宜俱依擬施行其站船水手工食銀兩吊取浙中事例酌處徑行凡有站船處所據此爲準其南京兵部及總督撫按總兵部屬各差應給外號勘合者以後俱要具本題

請方准給發填給將盡預期再請仍各照將用過勘合造冊繳報青冊送部以便稽查及查大興遞運所每年真定等府饒陽等縣編發站銀二千二百六十兩近因裁革冒濫本部於去年十一月間委官清查餘羨稍盈兩年支用該府前銀似當將萬

曆五年分蠲免一年以寬民力萬曆五年正月二
十五日太子少保兵部尚書譚 等具題本月二

十七日奉

聖旨是朕軫念小民困苦節有明旨清查驛遞期以
除弊安民乃各撫按官全不體朕心特題准事理都
視爲故紙背公徇私牢不可變又訪知近日朝覲官
有遣牌馳驛的一槩應付若不奉公差得以傳牌應
付則勘合俱屬無用清查亦何有益此等情弊你部
科豈不悉知竟未見奉旨叅奏何忍於負朝廷而不

敢違私請豈佐朕奉天養民之意今次姑再行申飭以後勘合都着具奏請給不許擅與有仍前違犯的撫按官并各地方有司俱以不職降黜你部科容隱不叅定行一體重治决不輕貸蘇松等處減編事理擬奏尚欠清楚姑依擬行站船水手工食着通行查減真定等處站銀准免派一年以甦民困欽此

為懇乞

天恩俯憐衝疲州縣議處馬匹拯蘇民困事查得隆慶二年五月內為酌陳馬政諸議以備採擇等事該太僕寺少卿武 奏稱南北直隸山東河南各府州縣民間種馬為害多端無益實用乞要盡行變賣本部酌議覆奉

欽依准賣一半每馬變價十兩每歲仍徵草料銀二兩其備用馬匹照舊徵解隆慶五年又該給事中梁 請將草料悉行蠲免本部議擬每年每馬止

徵草料一兩又查得萬曆四年十月內爲懇乞

天恩俯憐殘疲邊邑等事該薊遼總督侍郎楊 咨
稱審雲縣地瘠民疲差繁賦重乞將寄養馬匹酌
量減免本部議擬將該縣見養馬匹堪充者儘數
調兌後有解到備用馬匹先儘別州縣派養足數
後派該縣寄養俱經題奉

欽依通行欽遵去後又查得山東沂州原額種馬一
千七百一十五匹變賣過一千二百零一匹見在
五百一十四匹郟城縣原額種馬八百四十五匹

變賣過五百九十二匹見在二百五十三匹費縣
原額種馬一千一百一十四匹變賣過七百七十七
匹見在三百三十三匹保定府完縣原額種馬九
百五匹變賣過四百五十二匹見在四百五十三
匹唐縣原額種馬九百五十五匹變賣過四百七
十八匹見在四百九十七匹新安縣原額寄養馬
二百七十二戶見養馬一百七十三匹順天府密
雲縣原額寄養馬七百九十四匹看得直隸印馬御史
孫 題稱巡歷所屬見山東等處歲被水災乞將

沂州鄒城縣費縣保定府完唐二縣見養種馬變
賣三分之一俵額以見養數永徵折色草料姑行
停免新安縣密雲縣寄養馬匹見在堪兌者盡數
調兌不堪者另行議處以後免行發養或暫免數
年或量減分數薊遼總督揚咨稱密雲縣原額
地二千八百五十七頃有零每馬一匹編地三頃
五十八畝共養馬七百九十八匹近年脩蓋營房
等項公用共去地三百四十五頃零地去馬存小
民偏累乞要照數減免額馬九十六匹各一節查

得原額種馬一十二萬五千餘匹立法初意不獨
專爲孳生亦可備濟緩急邇年以來議題變賣十
已去其五六今計沂費郟完唐等州縣共原額種
馬五千五百三十四匹變賣過三千五百匹止存二
千零三十四匹似難再議但御史孫 職專馬政目

孳民艱題

請前來相應酌處合將沂費郟完唐等五州縣見養
種馬二千零三十四匹內量賣三分之一每匹估價
銀十兩解寺草料暫免二年自萬曆七年爲始照

例徵銀一兩其備用馬匹行太僕寺於兗州保定
二府每年扣派數內通將折色派與沂費等州縣
餘下本色分派同府成熟地方俟年來豐收照舊
徵解新安密雲縣寄養馬匹通照近行事例堪兌
者先儘調兌不堪者另行酌處以後解到備用馬
匹如果數少暫免給養兩年總督楊 咨稱密雲
縣公占地三百四十五頃每三頃五十八畝養馬
一匹相應永免發馬九十六匹合候

命下行令各該撫按及太僕寺遵照施行再照各邊

互市夷馬雖多然土性未習養兌皆難今雖僕寺馬價少有餘積而蓄牧之數較前減半先今各處種馬既經變賣牧馬人戶似已少蘇萬一軍興乏用實於

國計無賴合無通行各處種馬州縣不拘先今變賣原額馬戶冊籍照舊存留待後年登揀選備用馬匹堪以作種者給與蓄牧庶幾初意不失軍需無虧再查順天等府所屬寄養馬匹本部委官兌給每稱養馬至十年以上者毛齒漸長軍士多不願

領年復一年日就憊駑目今臆壯猶可變賣合行
太僕寺通查給發寄養馬匹十年以上不堪調充
者從長計處務期官民兩便等因萬曆五年三月初六日太子少保本部尚書譚 等具題本月初八日奉

聖旨是欽此

題爲查催馬價復給全銀急救貧民殘喘事查呈
到部看得山東巡撫都御史李 題稱江南糧僉
馬價節年積欠三十餘萬累及本省包賠至於民
力不支乏役稱苦若非嚴限督催他省有司終屬
怠玩議將嘉靖隆慶年間所欠銀二十六萬一千
二百三十四兩移文各該撫按衙門通行所屬盡
數蠲免其萬曆元年二年三年欠銀四萬三千三
百一十五兩九錢五分三釐每年帶徵二分與見
徵萬曆四年全數定限解給代役當過工食弁補

司庫借過銀數以後見徵銀兩務令當年全完如
再因循延欠責成撫按卽照京邊錢糧事例經管
正佐等官各按分數叅奏降罰及稱馬價徵足銀
有盈餘將代養糧僉馬匹增復舊數本省續加銀
兩量爲裁減一節爲照江南馬價節年積欠數多
致累東省疲民似當設法催解但歷年久遠遽行
槩徵尤恐民力不支合宜酌量蠲免旣經山東巡
撫行令司道會議具題前來相應議擬恭候

命下本部移文山東巡撫都御史及咨都察院轉行

彼處巡按御史將江浙蘇松等處馬匹查自嘉靖
隆慶年間銀兩除徵解已到者查給其餘欠銀二
十六萬一千二百三十四兩冊開細數移文各該
撫按衙門通行所屬州府縣查有已徵在官者仍
行解給如係民欠未徵者所在明示曉諭盡數蠲
免其萬曆元年二年三年共欠銀四萬三千一十
五兩九錢五分三釐每年帶徵二分與見徵萬曆
四年全數定限以咨文到日爲始限半年以裏通
行追完解發山東布政司散發代役應給之人及

補還司庫借過銀數以後見徵銀兩務要當年全完每年終將完欠分數咨部查覈如有因循延欠解不及期者聽各該撫按遵照京邊錢糧事例將經管正佐等官各按分數叅奏降罰嗣後徵解及時銀有盈餘增復糧僉馬價等項悉如所議施行仍將行過事宜咨部查考萬曆五年三月初十日太子少保兵部尚書譚 等具題本月十二日奉聖旨是欽此

題爲議留賠補入衛兵馬價以便騎操事案呈到
部看得巡撫大同都御史鄭 題稱本鎮入衛薊
鎮官軍在薊倒死馬匹給價領買宣府市馬往返
勞費不便要將大同市馬就給本鎮官軍部發價
銀卽作本部歲發大同年例市本之數其宣府應
得年例如有不足仍行補發以免往返一節爲照
各邊入衛官軍馬匹原係各鎮自備始議遇有死
馬仍於該鎮處補繼因各鎮買補不前奏討紛至
議將薊鎮註防月日馬匹倒失請發太僕寺銀聽

給各領兵官回鎮買補後因互市夷馬騎操足內地賠補之缺而官無費財節邊關喂養之需而軍無累害一舉兩得法甚良也再查各鎮各有歲發互市買馬年例之銀多寡不等薊鎮歲查各鎮入衛各兵死馬之數方爲議請原無定額卽今開市旣久各鎮積馬數多宣府非獨盈大同非獨歛市宣府之馬以補大同移大同之軍而赴宣府道里往來委屬未便旣該巡撫鄭 題議前來相應依擬歷查各鎮入衛官軍在薊倒失馬匹通計每歲

數不甚多歲支馬價亦不甚廣原係一年倒失買
補之數不應扣除各鎮年例市本合候

命下咨行大同督撫官將前次給發大同入衛馬價
銀三千一百二十兩存留本鎮卽將調習市馬照
數給發入衛官軍騎征其萬曆五年各鎮入衛官
軍在薊鎮倒死馬匹係大同者准於大同買補係
宣府者准於宣府買補所用之銀俱不在各鎮年
例之內永爲定例仍咨宣府巡撫查將收過延寧
入衛弁本鎮入衛馬價數目扣筭如不足本鎮原

議事例市本咨部處補等因萬曆五年六月初四
日少保兼太子太保本部尚書王 等具題初六
日奉

聖旨是欽此

題爲比例折解班銀以蘇民困事車駕清夏
呈奉本部送准都察院咨據巡按直隸監察御史
邵 呈奉本院勘劄准兵部咨前事等因咨院備
劄前來奉此依奉案行潁州兵備道查報去後今
據該道兵備僉事朱 呈行查過廬州府額派

荆

淮等府校尉僉克年間軍民選補緣由到部送司
案查萬曆四年七月內該巡撫鳳陽兵部左侍郎
吳 巡按直隸監察御史舒 會題前事要將廬

州府屬無爲六安二州合肥等六縣額僉湖廣等處各

王府校尉比照河南府屬事例折銀解府雇人代役該本部議擬覆奉

欽依咨行巡撫衙門轉行河南湖廣江西山東各巡撫轉行布政使司行各

王府長史司及咨都察院轉行巡按御史行無爲六安合肥等州縣備查廬州府屬州縣校尉原籍是否軍民僉充於何年間奉何事例坐派去後今

據潁州兵備道查過廬州府屬州縣額派

荆

淮等府校尉軍民僉充年分名數前來未有各巡
撫衙門行各

王府長史司查明咨回緣由及照

興府

龍飛一應校丁若係從

龍則改隸錦衣衛若留藩邸則改隸

顯陵再查

梁府國除墳墓俱屬

興府承管其所存校丁似已先屬

興邸今計必歸

顯陵須行承天守備衙門查明方見詳的等因案呈

到部看得巡按直隸監察御史邵 呈稱要將廬

州府屬州縣額派各

王府校尉比例折銀解府募役一節莫非俯恤民

瘼以蘇繁役但事干

宗藩未經各衙門查明覈實有難輕議擬令再查

爲此合咨前去煩爲轉行巡按直隸御史會同巡撫部院查照先今事理轉行河南湖廣江西山東各巡撫衙門備查明確會議停妥徑自具題以憑議覆施行

題爲敷陳末議以仰禱

聖治事案呈到部看得江西巡撫都御史潘 巡按

御史趙 會題所屬驛遞站銀每年於均徭驛傳

二項下派徵一十萬六百五十餘兩近自奉例節

省減編銀二萬八十有奇止編七萬二千六百餘

兩及查節年支剩已未完銀八萬五千二百三十

餘兩內將已徵在官銀四萬九千五百九十九兩

有零動支四萬九千二百八十兩零抵免萬曆六

年分驛傳項下站銀止徵均徭銀二萬三千三百

五十九兩有零，贖補一年支用，其未完民欠餘銀三萬五千有奇，分年帶徵完解。俟後積有盈餘，再議免派。及稱今議實編支應銀數，僅足歲用，無容拖欠。每年終查筭，如有催徵不前者，照例叅治一節，爲照驛傳條例開載。本明歷朝以來，累行申禁，自波流於正德之末，觴濫於嘉靖之中，徵發無限，民困日深。先任刑部尚書鄭建白於前，本部尚書楊酌議於後，諸凡弊端，稍稍釐革，而頻歲以來，稍復冒濫。以此言官敷陳本部題覆節奉

嚴旨稽查通行各省直酌議減編去後所據奏冊到部南直隸浙江等省及順天河間保定三府未及十處免徵一年及借留織造之數不下四十餘萬其議處減編之數又且一半有奇矣卽今本部酌處

題覆填給行使雖未嘗寬假以徇人情實不敢過爲刻削以忘賓旅此衆所覩記也但查各處冊籍簡明固多間或有目無綱則難於檢括或有總遺細則苦於扣除或裁省太多似非可繼或盡仍舊

貫終屬虛文今該江西巡撫都御史潘 巡按御

史趙 會題前事計道里之衝僻以度支應酌歷

年之省數以定減編以節省五分之內而永免其

三則嗣後無復派之虞以貯庫見存之銀而取以

支給則宿逋無難追之患水夫以行住定工食而

得稱事之宜近欠限年分以帶徵而有緩二之善

再查清冊開載條分於前而各府減存之詳指掌

可見總結於後而一省編支之數舉目可知卽猶

胥巨蠹無從操其竒贏貪官污吏難以容其乾沒

真足以仰承

德意下恤民窮編僉驛傳此爲準則合候

命下本部移文江西撫按將南昌等十二府屬應徵
萬曆六年分驛傳項下站銀四萬九千二百八十
六兩六錢零盡數免派一年於已徵在官節年支
剩餘銀四萬九千五百九十九兩有零內動支抵
用仍將應徵均徭項下銀二萬三千三百五十九
兩八錢照數徵補一年支用其未完民欠銀兩再
議徵免實數分作三年帶徵限自萬曆六年起至

萬曆八年止追完俟後各項支剩餘銀并扣存水
夫工食積有盈餘再議免派一年其萬曆七年并
以後年分站銀照今議減數目每年實徵七萬二
千六百四十六兩有零俱限本年盡數完報如有
掌印督糧等官將見徵帶徵年分銀兩完不及數
卽照戶部題

准事理查叅罰治再照慮不厭詳法求盡善先議水
夫住留之日每船二名看守在於浙直閩廣腹裏
水勢溢小本已足支至如湖廣江西淮揚地方江

濱湖口巨浪怒濤不徒撐駕行使必須多人即使
駐泊河埠篙工舟師亦不可少莫若行令沿江沿
湖官站船隻停留之日本船水手量爲存留看守
每名半給工食及至出差計日全支回日卽仍半
給此則費不加增人自不乏至如舊欠站銀分限
催徵亦爲可行但催欠之數未必盡是拖賴或係
貧難無措或以拋荒無徵既有減省積剩此皆在
官餘贏與其併追完官爲他日蠲恤之資孰若查
實量爲蠲免以寬目前一分之賜仍候

命下行令該省撫按再加查議徑自酌處施行緣係
敷陳未議以仰禱

聖治及奉

欽依兵部知道事理未敢擅便謹題請

旨

萬曆五年十一月初十日太子少保兵部尚書方
等具題本月十二日奉

聖旨該省處置驛傳減編免編事宜極爲停妥潘季
馴趙燿實心愛民能奉行朝廷德意着吏部紀錄擢

用所奏都依擬其拖欠帶徵分數准盡行蠲免以甦
民困欽此

題爲議處驛遞站銀以甦民困事奉本部送兵科抄出整飭薊州等處邊備兼巡撫順天等府地方

都察院右僉都御史陳

題

云

等因案呈到部

隨查所題庫貯南馬等銀二萬餘兩先據順天巡撫都御史王題稱動支前銀六千八百餘兩脩築灤縣城垣本部覆奉

欽依咨行照數支用外前項銀數實在似係一萬五千餘兩今該撫按議將前銀抵補災傷州縣萬曆六年分協濟是謂倒懸之急所當亟拯者也該府

議將前銀准作萬曆六年分驛遞支用槩府通蠲
站銀三分之一又稱萬曆四年以前各州縣舊欠
站銀并乞蠲免似爲浩蕩之恩所當會徧者也此
皆仰承

德意下恤民窮相應酌處但照前項站銀減省數多
則積剩拖欠皆是餘羨所屬州縣旣累被災傷卽
使催科亦無從措辦見在餘銀合應先儘被災地
方抵補次年協濟正數其四年拖欠未完站銀不
分災傷成熟等處一槩通行蠲免此則施仁先及

于無告洪恩均被于京畿樽節休養之中得施爲
緩急之序矣合候

命下移咨該撫按劄行該府通查前項站銀一萬五
千五十餘兩內除馬錢等應領人數遵照前奉

欽依支領外其實在銀兩查將疲累被災州縣額編
萬曆六年分協濟各驛遞站銀酌量減派就將前
銀抵補充用萬曆四年以前未完站銀除已徵在
官及收侵者照舊追併外查係小民拖欠者悉行

蠲免再照

京師爲天下之樞四輔乃股肱之郡查得大興遼
運所協濟夫銀係真定廣平順德大名河間五府
饒陽南和內黃寧津威清等六縣每年通共徵解
二千二百八十兩萬曆三年以前一歲夫役支用
一千二百餘兩近來清查之後每年約用不及八
百兩卽今本部委官查盤實在庫銀一萬八千餘
兩足敷十年支用除先題蠲免萬曆五年分各府
協濟一年外前項官庫存積莫非民間膏脂今該
真定等府旣各有災傷相應量免數年大昭寬恤

况省立各處俱已奉例減編

恭轍之下節省既多徵派如故尤非一視同仁之意
併候

命下行令該撫按將萬曆六年起至萬曆八年止查
照協濟處所通行蠲免仍將見在餘銀支用其萬
曆九年以後每年共減編銀八百八十兩實編銀
一千四百兩務要依期徵解無得延欠照例查叅
緣係議處驛遞站銀以甦民困及節奉

欽依兵部知道事理未敢擅便謹題請

旨

萬曆五年十一月二十日太子少保兵部尚書方
等具題本月二十二日奉

聖旨畿輔重地小民窮苦朕心深切軫念這所奏協
濟站銀夫銀抵補蠲免減編等項事宜俱依擬以甦
民困其該府餘剩銀兩與部覆支存數目不同還查
明行欽此

題爲比例陳情乞

恩賜給校軍以便

朝叅事車駕清吏司案呈奉本部兵科抄出錦衣衛親軍指揮使司帶俸指揮使王奏奉

聖旨兵部知道欽此欽遵該兵科叅看得錦衣衛帶俸指揮使王 奏爲比例陳情乞

恩賜給校軍以便

朝叅一節爲照校軍乃

朝廷侍衛禁役原無撥給戚畹跟用之例今俸既

居戚里則優渥之恩自當次第

錫予何必遽爾自行陳乞奏內所比王極沈至事例
果否相合抄宜查酌施行通抄到部看得錦衣衛
帶俸指揮使王 奏稱

朝叅陪祀乏人跟用比照王極沈至事例撥給校
軍跟用一節爲照王偉甫列戚晚漸致顯榮自當
黜浮崇雅以成退讓之名不宜率遽陳乞以侈騶
從之盛旣經兵科叅酌前來合應查處但查

皇親王極沈至俱以外戚蒙恩列銜禁近先曾比

例上請頒給軍校隨從及行該衛覆查亦稱事體
相同錫之從人似非過溢合無勉如所請恭候
命下行令錦衣府軍前二衛照例撥給校軍各三十
名跟用

恩典出自

朝廷臣等不敢擅便